

# DESPARTIDO...

“Prouvènço d’aro” es en grand dòu, vèn de perdre un de si primadié, Glaude Emond.



# Prouvènço d’aro

Tóuti li mes, lou journau de la Prouvènço d’aro

Setembre 2014

n° 302

2,10 €

## Glaude Emond

Glaude Emond nous a quita à 68 an... “Prouvènço d’aro” i’es forço devènt. Èro aqui à la foundacioun dóu journau e n’assegurè tant lèu la gestioun amenistrativo e coumtable.

Militant dóu mouvamen PARLAREN fuguè toujours presènt dins tóuti li gràndi manifestacioun d’aparamen de la lengo, que siegue à Toulouso pèr ócupa l’estation de televisoun regiounalo vo à Marsiho pèr ajuda à l’organisacioun dóu proumié grand defilat sus la Canobiero. Pèr carriero i’èro de-longo pèr aficha “Prouvençau boulegan”, “Prouvençau parlaren”, “la gardaren riboun-ribagno nosto rebello lengo d’oc”. Èro dins tóuti lis acamp associatiéu, fièr tambèn de ié mena sis enfant Estello e Sebastian... cepoun dóu militantisme de soun paire...

Glaude Emond èro pas un ome en bousco di vani glòri, coumplissié soun devé pèr buta à la rodo dins l’acioun que se menavo pèr apar la lengo sènso demanda mai que de faire avança nosto revendicacioun en ounèste ome, ome d’ounour...

Defugissié pas l’obro, defugissié pas nimai li respounsabilita...

E quand fauguè, dins l’urgènci, mena la listo “*Région Provence*” is eleicioun regiounalo de 1992, quouro Bernat Giély tèsto de listo, reçaupèguè l’interdicioun de la Prefeturo de se presenta, de pèr sa proufessioun, Glaude Emond fuguè lou numerò un pèr teni l’empento.

Mai, bèn-segur, li piado de soun obro se retrobon d’en proumié dins li journau “Prouvènço Dau!” e “Prouvènço d’aro”, Glaude Emond èro demié li redatour, mai subre-tout n’èro lou dessinatour atitra. Caricaturavo d’un bon biais satiri l’actualita pertoucant nosto acioun militant.

Dins li tempèsto e lis esglàri, que menaçavon de faire coula lou journau, sachè aqui mai teni l’empento pèr faire avans...


Malurousamen li tressimàci de la vido socialo faguèron que deguè s’aluencha de Prouvènço, mai manquè pas de trasmetre soun gàubi de beileja l’associacioun à Tricio Dupuy que perlongo em’ uno mestriò judiciouso lou biais de faire de soun davancié qu’òublidaren jamai.

Glaude Emond restara, de-bon, uno di foundamento soulido de noste journau e soun militantisme, un bel eisèmple de desvouamen, de doun de se, de bounta e d’annegacioun.

Encaro gramaci Glaude pèr l’obro coumplido tant bountousamen, restaras pèr toujours demié nous-autre coume un moudele.

La Redacioun

## Maiano en fèsto pèr Mistral



### Dissate 6 de setembre

11 ouro: Cèntrè culturau Frederi Mistral, à Maiano.

Counferènci “Mistral, Roi de Provence” pèr Charles-Armand Klein. Presentacioun e dedicaço de soun oubrage “Bonjour, Monsieur Mistral”.

14 ouro: Rendès-vous au Museon Mistral.

Vesito tiatralisado sus li liò de vido dóu pouèto. Emé lou counours d’un guide counferencié, de groupe de tradicioun, l’Ataié dóu costume de Maiano, lou Riban de Trencò-Taio d’Arle e de coumedian...

16 ouro 30: Cèntrè culturau Frederi Mistral.

Proujeicioun dóu filme “Mon idéal”; uno jouino chato de vuei sus lou parcours de Mirèio. Filme de Roger Pierre-Auguste.

### Divèndre 12 de setembre

À 20 ouro 45, au Mas dóu Juge: Grand espetacle liri prouvençau e francès.

“Mireille... Sus li piado de *Mirèio* de Frédéric Mistral au camin de l’opera *Mireille* de Charles Gounod”. Quand Mistral rescontro Gounod. Meso en sceno Patrice Blanc.

### Dissate 13 de setembre

À parti de 10 ouro, Cèntrè culturau Frederi Mistral, coulòqui, presentacioun e dedicaço de libre, tauilo redouno.

11 ouro: dins lou vilage, grand cavaucado: Prouvènço e Camargo.

15 ouro 30: Cèntrè culturau Frederi Mistral. “L’extraordinaire aventure du bousier qui lisait Jean-Henri Fabre!”.

Documentari animalié en ver-

sion prouvençalo de Sacha Bollet e Benoît Demarie.

15 ouro 45: dins li carriero dóu vilage. Grand roumavage e passo carriero.

17 ouro: dins lou plan de carreto. Espetacle camargués dóu centenàri: “La Camargo en liberta”.

21 ouro, plaço di café, Grand councert “Musico di Regioun au païs de Mistral” emé lou counours dóu *Collectif Provence* anima pèr li groupe: Crous e Pielo de Marsiho, Zóu Mai Aqui de Touloun, Trenincorsa de Loumbardio e Projecte Mut d’Ibiza.

### Dimenche 14 setembre

10 ouro: Grand Messo soulènno en prouvençau, seguida d’un passo-carriero e ounenage dóu Felibrige.

Miejour: Aperitiéu Councert emé lou groupe *Le Condor* e repas di regioun.

14 ouro 30: Cèntrè culturau Frederi Mistral, “L’extraordinaire aventure du bousier qui lisait Jean-Henri Fabre!”.

15 ouro 30: Grand passo-carriero à la glòri de Frederi Mistral. Courtège prouvençau evoucant lis obro dóu pouèto, emé lou counours dis enfant dis escolo e de nombrous groupe regiounau (+ de 500 participant).

16 ouro 30: Milo farandoulo coumverjon vers la Plaço di café.

18 ouro: Councert finau de la Muso Maianenco.

Tout dóu tèms, fiero i papié e libre regiounalisto, bourso i costume ancian e acessòri de costume, espousicioun d’artisan d’Art, jo ancian en bos...

### “Kitis”

#### un rouman inedit

Fèsto lou 5 d’òutobre, en Aureio pèr la sourtido dóu libre de Grabié Courlet...

Pajo 3

### Anniversàri

#### Jan Jaurès

Fai 100 an de desporeiguè aquéu grand ome pouliti que parlavo nosto lengo...

Pajo 6

### M coume Mistral

#### à z-Ais

Lou pouèto de Maiano à l’ounour dins uno aprocho scientifico e festivo ...

Pajo 3